

◦ Datuen babesaren administrazioan ◦

# Bermaturik al dago konfidentzialtasuna?

Herritarrok datu ugari lagatzen dugu administrazio publikoaren esku, eta horiek txarto kudeatzeak, arrazoia edozein izanik ere, kolokan jarriko luke datu babeserako oinarritzko eskubidea. Nahikoa zorrotz babesten al dute pilatutako informazioa?

JON TORNER



NAVARRA.ES

**Irudian, ogasuneko izapide administratiboak Nafarroako egoitzetako batean. Administrazioek guri buruzko informazio asko biltzen dute.**

ESPAINIAKO TRAFIKO ZUZENDARITZAREN (DGT) webgunera sartuta, gelditzen zaizkien puntuen gaineko informazioa kontsulta dezakete 24 milioi gidarik. Norberaren historia erreparatzeko, nahikoa da nortasun agiriaren zenbakia, gidatzeko baimenaren luzapen-data eta helbide elektronikoa ematea. Informazio gutxiegi dela uste du Datuak Babesteko Espainiako Agentziak (AEPD), sistema ez dela nahikoa segurua, erabiltzaileen datuen konfidentzialtasuna ez dagoelako guztiz bermaturik. Alegia, pazientzia eta abildade apur

bat duen edonor sar daitekeela gure historia-lera eta informazio hori bere probetxurako erabili. Datuak Babesteko Agentziak DGTri ohartarazi dio Datu Babesen Lege Organikoa urratzen ari dela, eta gidarien gaineko informazioa zorrotzago babesteko agindu dio. DG Tk, ordea, ez du eskaera aintzat hartu. Sistemak “zuloak” dituela onartu arren, “ikuspuntu juridikotik” hura aldatzera derrigorturik ez dagoela adierazi du. Gainera, oraindik inork ez omen du gidarien identitatea ordezkatu. Oraindik. Inoiz halakorik ger-

tatzen bada, zein neurri hartuko lirateke? Zein zigor ezarriko litzaioke DGTri, edo dagokion administrazioari? Nork jarriko lioke zigorra? Eta bitartean, nork behartu dezake DGT babes-neurri eraginkorrak aplikatzea?

“Estatu mailako erakundea denez, Datuak Babesteko Espainiako Agentziari dagokio DGTr egindako arau-hausteak deklaratzeko”, esan digu Román Intxaurtietak Datuak Babesteko Euskal Bulegoko (DBEB) lege-aholkulariak. Entitate publikoa den heinean, DGTri ezin zaio zigor ekonomikorik aplikatu: “Arauhasteak deklaratzearen xedea da portuare desegokiak desagerrarazi eta etorkizunaren ere halakorik gerta ez dadin bermatzea. Hori ez dute isunek lortuko, zentzugabekeria litzatekeelako administrazioak administrazioan bertan biltzea dirua”. Arau-hauste argia dagoen kasuetan, administrazioari ondare-erantzukizuna exijitu ahal zaio, bere fitxategietan dagoen informazio pertsonala arduragabekeriak babesteagatik. Intxaurtietaren hitzetan, “zigor ekonomikorik ez aplikatzeak ez du esan nahi erantzukizunik eta kalte-ordainik ez dagoenik, erantzulea kaltea egin duen langilea izango baita, eta diziplina-neurriak ezar dakizkioke; kalte-ordainari dagokionez, ondare-erantzukizunaren bidea dago, kaltetuak administrazioaren aurrean edo bide judizialean baliatu dezakeena”.

Datu-babeserako eskubidea –administrazioaren aurrean– lekuan lekuko agentziek edo Espainiako AEPDk bermatzen dute. EAEn, Datuak Babesteko Euskal Bulegoari dagokio euskal administrazio publikoek egiten dituzten datu-tratamenduak zaintzea. Aldiz, Hego Euskal Herriko entitate pribatuek egiten dituzten tratamenduak Espainiako Agentziak kontrolatzen ditu. Horiei, enpresa pribatuei, jarri ahal zaizkie zigor ekonomikoak. Hain justu, kritika gehien alde horretatik jasotzen ditu datu-babesaren kontrol lanak. Administrazioak ez du egindako

**Geroz eta prozedura gehiago has daitezke Internet bidez: zerga aitorpenak, langileen kotizazioaren ingurukoak, erregistro publikoak... Batzuetan, zilegi da administrazioek bildutako datuak elkarren artean trukatzeko, baina gehienetan, nahitaezkoa da interesdunek oniritzia ematea lehenbizi**

arau-hausteengatik (dirurik) ordaintzen, eta entitate pribatuek bai; legea ez betetzeak ez du kostu ekonomikorik administrazioarentzat. Herritarren begietara, gainera, ezer gutxi egin daiteke administrazioaren kudeaketa kontrolatu eta salatzeko. Esparru ezezaguna da askorentzat.

“Datuak Babesteko Euskal Bulegoaren eginkizunetako bat hori da: oinarritzko esku-bide hau herritarren artean ezagutaraztea”, dio Intxaurtietak. “Oro har, jendeak uste du pribatutasuna galtzea ez dela gauza hain larria, baina herritarrei azalduz gero zein ondorio ekarri ahal dizkien datuen erabilera okerrak, interesa pizten da haiengan, eta une horretatik aurrera, gaiari buruzko gero eta informazio gehiago eskatzen dute”. Herritarrek badaki haren eskubidea noiz urratzen duten: “Fitxategia, tratamendua, lagapena, datu pertsonala, arduraduna eta eragilea bezalako kontzeptuez eta arlo honetako oinarritzko printzipioez ari naiz”, azaldu digu Intxaurtietak, “esate baterako, informazioa, adostasuna, eta datuen kalitate edo segurtasuna”.

**Telefono-gidetatik ken nazazue**

DBEBko lege-aholkulariaren hitzetan, “funtsezkoa da datuaren kultura hedatzea”. Herri-

**Ogiaren egia**  
*Denda berritu dugu!  
 Zatoz eta bidaiatu  
 iraganeko okindegi  
 xarment batera*  
**Galparsoro**  
**OKINDEGIA**  
*Antzinako ogiaren  
 kabia bihurtu baitugu  
 denda zahar berria*

Kale Nagusia 6 (Alde Zaharra) - DONOSTIA - Tel.: 943 421 074

**Datu Pertsonalen Babesa - LOPD**

Legedira egokitzeko prozesua  
 (euskaraz, pertsonalizatua)

943 453 588 · [www.SIGACUS.com](http://www.SIGACUS.com)

## Datuak, enpresa pribatuen esku?

Posible al da administrazioak dituen datuak enpresa pribatu baten eskuetan erortzea? Román Intxaurtietaren hitzetan, "posible, posible da, baina administrazioak kasu gehienetan ondo babesten ditu herritarren datuak. Egin ditugun inkestean arabera, jendea fio da administrazioaz; bildutako datuak ongi babesten ditu. Batzuetan, administrazioak zerbitzu bat (aplikazio informatiko baten mantentze edo garapen lanak, adibidez) kontratatzen dio enpresa bati, eta nahitaezkoa da hari datu pertsonalak ematea. Kasu horietan, kontratuak agindu zehatzak jaso behar ditu: datu horiek nola erabili eta babestu behar diren, lana amaitzean administrazioari itzuli behar zaizkiola eta abar. Kontratuan agindu edo klausula horiek sartuz gero, enpresa izango da erantzulea datuak txarto erabiltzen baditu".



ROMÁN INTXAURTIETAK UTZIA

tarrak eurengana noiz jo dezakeen azaldu digu: "Batetik, euskal administrazio publiko- en aurkako salaketak jar ditzake, uste badu ez dutela errespetatu datu-babeserako oinarrizko eskubidea. Bestetik, gure babesa eska dezake datuetara sartu, zuzendu edo ezerezteko eskubideak ez direla bete pentsatzen badu".

Badira beste eskubide batzuk, Datuak Babesteko Erregistroa kontsultatzeko, kalteordaina hartzeko, telefono-gidetatik kentzeko eta nahi ez den publizitatea ez jasotzeko eskubideak, esaterako. Telefono-katalogoetan agertzen diren oinarrizko datuak interesdunaren onespenean gabe lortu daitezke. Telefono-zerbitzuetako abonatuaren katalogoetan gure izena, abizena eta helbidea agertzen dira, eta horietatik kentzeko eskatu ezean, datuok edonork kontsultatu eta erabil ditzake. Nahi izanez gero, abonatuaren katalogoetatik gure datu guztiak edo batzuk doan ken ditzaten eskatzeko eskubidea dugu.

"Ahalegina egiten dugu herritarrari laguntzeko", adierazi digu Intxaurtietak: "Oinarrizko eskubide honen gainean behar duen informazioa eskaintzen diogu, eskura dituen

### Isunak publiko

**Intxaurtietari galdetu diogu: Aldizkari ofizialetan argitaratzen al dira herritarren datuak, isunak eta halakoak? "Normalean ez. Buletin ofizialetan agertzen diren isunak argitaratuak izan dira ezinezkoa izan delako interesdunari jakinaraztea. Harekin harremanetan jarri nahi baina lortzen ez bada –bi saiakera eginda–, etxean ez dagoelako edo uko egiten diolako, legeak baimena ematen du ebazpena publiko egiteko".**

baliabideei buruzkoa, administrazioei eskatzen diegu pertsonen eskubideak asebetetze-ko eta administrazioek deklaraturata dituzten fitxategiak argitaratzen ditugu Erregistroaren bidez, besteak beste".

### Zein datu truka ditzakete administrazioek?

Administrazioek guri buruzko informazio piloa biltzen dute. Geroz eta prozedura gehiago has daitezke Internet bidez: zerga aitorpenak, eskaera konkretuak toki-korporazioetan (udaletan, adibidez), langileen kotizazioei begirako aitorpenak, erregistro publikoak... Batzuetan, zilegi da administrazioek bildutako datuak elkarren artean trukatea. "Oso zaila da zerrenda zehatza egitea", dio Intxaurtietak. "Zenbait kasu oso argiak dira: legeren batek esaten duenean trukeak egin daitezkeela; bi administrazioek (lagapen-hartzaileak eta lagatzaileak) gai berari buruzko eskumenak dituztenean (gizarte zerbitzuen kasuan gertatzen den bezala); edo fiskaltzak, epaileek, epaitegiek, Arartekoak edo Herri-Kontuen Epaitegiak eskatzen dizkietenean datuak administrazioei". Hala ere, gehienetan, arau orokorrak hala zehaztuta, nahitaezkoa izaten da interesdunek oniritzia adieraztea lehenbizi. Bereziki babestutako datuak direnean (ideologia, erlijioa, sinesmenak, sindikatu afiliazioa, arraza, osasuna eta bizitza sexuala) datu-tratamenduak egiteko bete behar diren baldintzak zorrotzagoak dira. ■

**argia.com** Informazio gehiago:  
**www.avpd.euskadi.net**: Datuak Babesteko Euskal Bulegoa  
**www.agpd.es**: Datuak Babesteko Espainiako Agentzia